



Ruben Garcia celebrando su cumpleaños na Magic



ORANJESTAD – Durante fin di siman cu pasa Ruben ‘Scorpio’ Garcia a celebra hunto cu su coleganan su di Cumpleaño!! Den un dushi ambiente di Pasco cu ham, ayaca y demas plato nan special di Pasco nan a pasa un rato ameno den studionan na Magic FM. Di parti di Klip Klap tambe hopi pabien y hopia aña mas di bida salud y goso!!

Awenochi Edjean ta lansa su tema promocional pa 2005!!!



ORANJESTAD - Segun informacion cu Klip Klap ta dispone di dje ta indica cu awe nochi pa 9:00 pm den e programa “Na Drempel di Fin di Aña”, e hoben cantante, orguyo di Aruba, Edjean Semeleer lo estrena su tema promocional pa loke ta bira e temporada di fin di aña pa 2005.

E hoben talento aki ya caba pa 2 aña tras di otro a brinda nos cu hoyanan di produccion manera “Hey...ta Pasco!”

vol.1 y “Hey...ta Pasco!” vol.2, Ademas di su multiple exitonan cu tur fin di aña ta zona den tur hogar, Edjean ta tambe Aruba su Rey di Dande 2004.

Ora nos papia di produccionnan di Edjean Semeleer nos ta papia di produccionnan di calidad hopi halto cu participacion di profesionalnan cu ta traha cu alma y curason pa brinda Aruba, e miho den calidad. Y ora nos papia di profesionalnan nos ta haña un Ivan Quandus, Hildward Croes, Doodle Sophia, Juan Carlos Petit, Delbert Bernabela, Carlos Bislip Jr. entre otro.

Ainda ta fresco den nos memoria e joya di produccion musical cu e hoben cantante a trece riba mercado den luna di Maart demostrando su amor patria y dedicando su talento na Aruba den e produccion titula “ Mi Pais ”, cu por cierto te ainda ta masha bon solicita. Mirando e coleccion di calidad di Edjean, semper ta keda e expectativa ta ki sorpresa

Edjean ta bin cu ne atrobe y awe nochi Aruba completo ta keda cordialmente invita pa scucha y disfruta di su tema promocional pa e temporada di 2005.

Un cos cu nos por divulga ta, cu e tema ta uno ya existente desde 1978, di e grupo Venezolano “Cardenales del Exito”, y ta un cancion cu a dal pega masha duro na Aruba e tempo ey. Awor treci dilanti den nos dushi idioma Papiamentu den voz di Edjean, cu adaptacion y sigur e toke diferente di e maestro Chucho Hoek.

Grabacion a tuma lugar na IQ Music Lab y parti di e produccion aki a ser prepara tambe na Venezuela, pues nos por bisa cu e tema tin su toke international.

Riba e pregunta cu si Aruba lo por disfruta di “Hey...ta Pasco!” Vol.3 ... e unico cos cu nos por bisabo ta: KEDA PENDIENTE!!!

Klip Klap kier a desea Edjean tur clase di exito cu su estreno y ta spera di por tende hopi mas di dje den e temporada aki.